

芹山集卷之二十一

書啓

納徵啓事 與白兵部宅

伏以

乾坤定配易寔重夫咸恒家國明倫禮尤嚴於正始
曰嬪攸訓卜吉利貞休茲允藉於雲仍嘉止實由於
天合恭惟

親家大人先生 尊府 業衍箕裘 德崇金璧克
媿世美用顯時髦 柱國勳庸允傳芳於未墜 錦
衣光寵式步武於無疆觀 池上之鳳毛來儀



聖代慶 朝中之鵠立繼列 明時奕葉象賢紹庭濟美

昔唐崇右姓江南稱第一之家而晉播風流海內屬

無雙之族睠茲伉儷雅重冠裳安為齊大之攀竊愧

秦嘉之賦男非王潤幸見擬于冰清署縮金章竊交

承於蘭秘白敬齋翁嘗為總督余時適承之茲署故云叨承一諾喜逾百

朋茲展儷皮慚無九物顧誠敦六五何嫌東帛之戔

戔而德涉二三奚取玄纁之縷縷矧曰崇儉近圖淳

古之風觀爾成文式頼然如之故尚申盟于月老喜

託乘龍水締好於天孫占諧鳴鳳

納采啓事 復梅宅

伏以

乾坤定位大婚啓萬福之原南北聯姻佳耦得一時

之雋明揚有待清白攸崇事偶出於人謀緣實作於

天合恭惟

親家先生 派衍箕裘 學宗閩洛壯年彈鋏氣衝

千里之虹霓雅志升堂秀本三江之波潤誠心直道

素重鄉評偉度清修行占政理周情孔思遠傳詩禮於

趨庭玉質金相不衍簪纓於繼世鳳麟挺秀芹藻馳

名爰取信於文宗翠巖黃公遂締盟於司寇陽濱徐

藐茲弱息僭附喬門奉冪洒粦幸葉同牢之慶祗修

箕箒勉圖中饋之貞粲粲三星恭承俟著瑩瑩六禮
謹用拜嘉爰託簡以陳詞冀同心而結好快覩乘龍
之會永延錫胤之休不宣

納采啓事 與沈亞卿宅

伏以 云 同前屬際桃天之會敬圖文定之祥緣繫

赤繩光浮玉洞恭惟

親家大人先生 尊府 詩禮名家

簡召司空 寵渥又聯手八拜 光祿瞻依密邇乎

重城奕葉象賢紹庭 士承譽髦濟濟乎成

均紫綬銅章列宿堂 花縣曾茲巨擘又擅江南

云 同前

婚禮成請白宅會親小啓

茲維

嘉禮告成宗祏有託百兩勤遠將之雅一時崇近古
之規喜溢盈門祥騰舊署謹卜中春朔日敬潔豆觴
奉板闥闈佳氣襲桃天之會文光挹牛斗之輝敢冀
賁臨不勝翹望

芹山集

請三代

誥命行實

先祖諱復宗原任錦衣百戶雅好讀漢書恒以忠義
自期待時正統己巳北虜犯城闕時議洵洵先祖乃
上疏毅然請行

制可之遂躬擐甲冑期以象戰克敵暨賊至鼓譟長驅賊
馬遂奔潰死者枕藉乃遂奪魄而去城賴以無虞吾
先祖亦身被流矢欽蒙

英宗皇帝論功陞錦衣衛世襲千戶續蒙

誥封爲武略將軍祖母唐氏封宜人襲廕至今近侍如其官此其爲

國宣力啓后人卓哉百世之武功也抑其讀書染翰形諸章奏足以動

當宁而傳縉紳則詩書禮樂遠有端緒固豈區區矢石超距者哉儒自垂髫時嘗聞懿訓於先子乃遂彊勉學問忝竊

明時祖之澤也維嘉靖甲申

天子寵命追贈父爲承德郎戶部主事母封贈如例暨嘉靖癸巳復蒙

恩詔追贈父爲中憲大夫山東東昌府知府母加封贈亦如例拜

命僂倭已再焚黃祭告矣獨念人本乎祖而襲封之典未之上及孫子之心其能以愆然乎顧禮典崇重非爵膺三品茂著勲庸者弗與備也何人而敢望此乃茲

聖天子明堂禮成推恩臣下該史部題爲開讀事內開陝西右叅政陳儒授中大夫祖父母父母妻封贈同拜

命僂倭循牆莫避三呼舞蹈衣被

天恩誠莫知所以爲報也敢以先祖平生行實撰次一二
伏惟

高明采擇撰入

制誥什襲珍藏當世世拜君之賜不朽矣謹

啓

又

先君諱賢由京庠入太學天性孝友問學純懿接人
待物藹如也弘治改元

欽授山西遼州儒學訓導陞武鄉教諭調河南登封歷官
凡二十五年門下登進士者五人中鄉試者八人應

貢者凡若干人尋陞

慶府紀善乃倣古紀室之職朝夕啓迪惟

祖訓昭鑒錄是範

王深嘉納之無何卒于官

王復震悼賜棺賜祭賻其詳具于林少宰氏誌銘暨穆
太史氏撰次墓表茲不敢贅乃嘉靖甲申欽蒙

天子寵命追贈父爲承德郎戶部主事母田氏贈安人繼
母尹氏封太安人暨嘉靖癸巳復蒙

恩詔追贈爲中憲大夫山東東昌府知府母田氏贈恭人
繼母尹氏封太恭人茲遇

聖天子明堂禮成推恩臣下授儒爲中大夫祖父母父母
妻封贈同蓋希世之遇也顧茲便蕃之寵曷勝感激
謹以家集一冊稽首馳

上用備采擇伏惟

高明鑒納俯賜褒揚

天葩睿藻奕葉欽承

錦軸牙籤萬代如見矣

又

儒不肖忝竊

明時日惴惴焉懼無以報

君恩而承先志也乃置勉歲月誤蒙

當道屢登薦剡乃遂受知

當字一命再命暨茲三命

宸章赫奕寵數便蕃顧儒何人而敢當此亦惟

明天子曠蕩之恩

大人汲引之力也茲循例

頒封諒塵

記室維儒薄劣萬無足爲

高明道者敢以節年諸公薦剡曾經

奏聞者附上用備萬一采擇第過情之聞寔切汗顏

臨楮誠不知所云也亦惟

台衡亮之儒不勝感戴竦仄之至

一爲乞崇明祀以勵風教事先君陳賢於弘治元年
蒙

欽授山西遼州儒學訓導于時同官者學正爲固安楊公
和協心講學分經迪士期以興起斯文作養人才用
盡以人事君大義節蒙

欽差提督學校副使楊公文卿稱之曰閩晉教官多矣無
如二職故一時出先君門下登進士者有若劉浙孟
儒中鄉試者有若孟陞王志入胄監者又有若楊訥

張真趙鳳張紀王徽等皆源流所及以科貢發身者
又有若趙鶴楊永祐孟居仁楊永福楊綏之等俱彬
彬然顯榮仕籍此皆載在試錄傳諸縉紳父老不可
誣也後學正楊公因伊子維聰任山西提學副使遂
得入祀名宦寔見遼士忠厚至意竊念先君與楊公
同時其得人之盛亦與楊公相埒又儒叨任浙江提
學副使節蒙

誥贈父爲中憲大夫近人

加贈爲中大夫陝西叅政

宸章赫奕三荷褒崇獨不得分半席地與楊公血食孝子

之心殊切未安如蒙伏乞

臺端轉行該州儒學及訪之縉紳耆老人等查勘先君在任之日是否有功學校及有無行誼可崇如果無碍及揆之祀典有合乞附入名宦祠內春秋祭享不惟先君死且不朽且將使生者亦勉圖報稱其於風教未必無小補云爾

芹山集卷之二十二

賜進士及第翰林院編修門人胡正蒙編輯
賜進士出身南京戶部郎中黎遵訓校正

公移

蒞任條約

東昌府為申明禁約以圖化理事准本府知府陳

關前事照得當職猥以庸疎繆膺

簡命付託允藉於專城

德意恒存乎仁息則凡民生之利病政務之修廢風俗之淳澆姦蠹之滋息百爾興革以期政平化洽用妥良

民咸係守土之責厥維艱哉爰念東昌名郡孔教猶存但習俗民情時或少異職受

命以來夙夜兢兢懼以仰承

明詔俯惠困窮百計思惟不遑寧處除自行砥礪外所有合行事宜敢告于后凡我合屬官民仰各奉公守法上下同心務求境內恬熙職等咸有休美如或縱恣不悛自干罪戾則

國有常刑茲無敢貸其慎之哉

計開

一守令民之師帥所以承流而宣化者也漢史曰庶民

所以安其田里而亡嘆息愁恨之心者政平訟理也與我共此者其惟良二千石乎職非其人濫膺重寄夙夜憂惶亦不敢不以古之良吏自期復念所屬地方廣闊其諸守令均有地方之責中間守已愛民志趨向上者固多聲望出流明揚有待然庸懦卑汗貪殘乖僻賄賂公行重戕國本者難保必無昔孔子論爲政曰尊五美屏四惡其言明白正大鑿鑿可行而真西山亦嘗以四事諭勉同僚又爲民去其十害此皆古今格言而前守諸君子亦嘗諭爾有同矣况今地方災傷尤宜加意憫恤凡我守令宜各大書一通

置之座右朝夕警省同舟共濟及凡利所當興弊所當革本職聰明之所不逮才力之所未周者務各開款盡言相告或一赴府面議可否以憑參酌施行期在事安民安不徒爲彌文粉飾之具如或自乖名教貪酷不悛除將考語註擬不識不時申呈撫按等衙門察行體點外若被人告發或體訪得出仍各參提從重問擬申請發落不敢姑息貽患地方其各圖之一吏典之設係該在房書辦文移承行案牘其情罪重輕緩滯多故又查催未完數凡一切應行應革事宜俱當職一親行審處其投文倒解各有限期如或

延遲俱行比較但恐奸頑之徒指以坐派查催掣批等項爲由駕言恐嚇愚弄鄉民挾詐財物至於官吏給由措勒尤甚玩法欺公深爲可惡除訪究平昔奸頑特甚者另行外自今以始仰各洗心滌慮保全身家無故不許私出衙門遊蕩飲博及令弟男子姪人等在外需索或指稱打點如或仍前故違許被害之人即時赴府稟告以憑照例問發充軍其所屬州縣亦宜具體此意嚴加禁革毋得縱容自貽罪戾一先王教民六行曰孝友睦婣任卹反是者則各有刑及伏讀

大明律內有惡逆之刑有不道之刑有不孝不睦之刑至
擬凌遲斬絞等罪蓋皆所以懲惡而導之善也東昌
素爲名郡禮義興行但世降風移日漸滋偽於辟邪
侈徃徃有之甚者殺人城市漫無所懲茲豈古人辟
以止辟之意哉今特爲爾百姓申告白孝于父母友
于兄弟和爾宗族勵爾庶耻毋酗酒毋博奕毋爭訟
毋寇竊告之而聽爾爲良民乃自不遭刑憲告之弗
聽本府體訪得出或被入告發當必悉照律例或處
以極刑或科以重罪決不少爲姑息以長奸頑以傷
風化其各圖之

一先王之教上自王公國都以及閭巷莫不有學是以
當時比屋可封人人有士君子之行今照東昌爲文
獻大邦豪傑挺出固有不待文王而興者然亦豈皆
若人乎鼓舞風勵之幾端必有在除各該州縣學校
奉有

卧碑及上司見行學規當職遵奉另行考驗外竊惟蒙以
養正作聖之功古者八歲入小學十五入大學此其
立教成規亦自有不可易者仰所屬州縣掌印官即
將本處社學動支無礙官錢速行修理推訪有德行
文藝或致仕教官或優等生儒或隱逸高士素爲鄉

問所推重者卑禮厚幣延請爲師通選在城及附近
鄉村俊秀子弟入學肄業歌詩習禮其授讀仍先之
以小學逐一講解明白令其口誦心惟久之氣質自
爾變化德性自爾溫純然後進之以四書經傳因才
而篤掌印官每月朔望下學行香畢即赴社學一體
考驗如果學有成效即將教讀優禮獎勸童生各定
等第行賞仍量免雜泛差徭其弗率者黜之至於鄉
村篤遠者亦許耆老人等會集隣近各社敦請塾師
教訓悉如前規本府按季或不時調考用驗勤惰以
俟以選庶幾相觀而善文教蔚興彬彬乎復鄒魯之

盛矣

一先正旌別淑慝表厥宅里彰善癉惡樹之風聲蓋持
此以勵風化也凡我境內如有忠臣烈士孝子順孫
義夫節婦未曾奏

聞旌表或已經奏

准未曾設立坊牌者許各開具姓名實跡緣由申府以憑
議奏區處施行

一禮補國奢示之以儉國儉示之以禮蓋所以坊民之
淫而約之中也訪得本府地方成化弘治年間民猶
淳樸習尚儉素故財用足近來日漸澆漓凡婚姻喪

祭侈靡相高了無餘積一遇歲凶則俯仰坐困恬不知悟况今民窮財盡尤宜節省爲此合行禁諭境內官民商賈之家凡一應吉凶燕會等事俱從儉約悉如先年故事不得恣行侈踰其喪事只照文公家禮舉行不得延用僧道修齋誦經費財傷化漫爲無益違者治罪庶幾古道可復而民財或少節矣

一獄禁人命攸繫昔人謂一夫在囚舉家失業囹圄之苦度日如年是固不可以不慎也訪得各該州縣往往泛濫拘禁濬滯罪囚甚至炎暑時月漫不清查疎放致使瘟疫相染無辜至死者寔多有之良可悼惜

仰各該掌印官即將見監罪囚除強盜人命貪污官吏侵盜係官錢糧重犯照舊監候外其餘戶婚田土一應小事并干審人證或捉人未齊等項俱令召保聽候其應禁之人亦要作急間斷應發落者發落應申詳者申詳不許一槩久禁其獄官吏卒將一應重囚時常點視嚴切關防亦毋得受人囑託將犯人昏夜謀死如違許同監人犯舉首及被害之家赴訴治以重罪各州縣每月終將見監獄囚姓名數目開具揭帖呈報以憑查考毋得朦朧隱匿取究

一先王發政施仁必先弇獨蓋顛連無告尤宜憐恤者

也仰各該州縣掌印官將境內一應貧民孤老審果
殘疾及委無依倚之人照例收養米布依時給散房
屋量與修葺疾病時加醫藥毋令失所及容令吏典
甲頭人等侵尅其有已死者即行開除若吏役人等
通同扶捏將家道稍可本無殘疾及有房族親屬可
以依倚者一槩朦朧造冊冒領衣糧徇各問罪發落
每季終將開收過花名備開揭帖送府查考

陳言時政

東昌府爲廣詢訪以修政務事准本府掌印知府陳
關抄蒙

欽差巡撫都御史邵 案驗內開轉行本府掌印等官并
通行所屬州縣等衙門各將前

巡撫都御史王 劉 節行軍馬城池錢糧詞訟等

項立有良法施行便益者俱照舊遵行不許廢弛其
各該官員若有應議重人民隱地方事宜益於政體
便於軍民及利所當興弊所當革者逐一開具揭帖
徑自申呈本院以憑采擇施行所議事件務要直言
簡易不許虛飾繁文亦不許將瑣細事情應該自處
者一槩申稟等因蒙此除軍馬城池錢糧詞訟等項
重大事其餘節經

巡撫衙門立有良法照舊遵行不敢廢弛及各該州縣倘有續到應議事體另行具稟外所有一二事務或有例見行而請乞申明或一時聞見而不敢緘默謹用條陳如左伏乞

采擇施行

計開

一均徭役以蘇民困

竊聞平天下之道慎於理財而推行之方存乎絜是蓋劑分量一廣狹君子所以通天下之志者也

該在平縣申稱逐年發下均徭則例濟南等五

超戶門銀三兩丁銀一兩東昌府則門銀四兩丁銀一兩五錢各府上上戶門銀二兩丁銀五錢東昌府則門銀三兩丁銀一兩又各府下中戶門銀二錢五分丁銀五分東昌府則門銀四錢丁銀一錢五分各府下下戶門銀一錢丁銀五分東昌府則門銀二錢丁銀一錢其他各則比之五府或加倍或過半寔為偏重百姓心懷不平無所控訴今年適當審編之期乞行布政司將所屬門銀丁銀議處與濟南等五府編派均平則民受無窮之賜等因具申蒙本院案行布政司丁門銀兩各府輕重不同者作何定擬節該

本司議擬前件項下開稱東昌府并濟南等五府各
丁門銀輕重不同候各府議處停當至日併入均徭
覆議呈奪庶事體歸一而先後不至紊亂等因備行
到府及據濮州申據本州民人閻朋等連名狀告先
年蒙

巡撫都御史盛 定立均徭六府人戶一例均平當
差年久向後復蒙本省發下均徭內開濟兗青登萊
五府上上戶銀二兩丁銀五錢惟獨東昌一府上上
戶銀三兩丁銀一兩相沿至今乞為轉達照舊均平
以均等因職等參求冊籍備訪輿情委的科差

獨重竊惟山東六府地土肥瘠相若人民貧富多寡
相若而審編之際獨為不均其最苦者尤在下中下
下人戶據其所出不常過倍矧東昌地當衝要每歲
進貢進鮮公差出使等項水陸經過殆無虛日窮編夫
役枵腹鞭背而呻吟之聲耳不忍聞雨夜牽舟而零
丁之苦目不忍見夫自析壤而言之則東昌固一方
之赤子也又自統會而言之則六府固雄藩之赤子
也而境土相連憂樂殊異則小民顛連無言求訴於
大父母者已非一日之積矣茲當審編均徭之年適逢詢
及芻蕘之會職等冒昧敢以轉聞如蒙伏望深惟民

隱一視同仁自今歲審編為始將六府門銀丁銀通行均派查得本省所屬共計一百零四州縣大約自一府所屬州縣言之各量帶一百四五十兩或七八十兩又自一戶一丁言之各量帶四五分或二三分而原額之數足矣如有不敷則將各項無名差役并投充各府各廟禮生及門皂兵快防夫等項減派名數免致徵銀負累則哀多益寡稱物平施小民陰受博人之惠將來世無數矣此實閭閻疾苦是川縷縷

言之伏願

合天下民幸甚

一廣儲蓄以備凶荒

竊聞國無九年之蓄曰不足無六年之蓄曰急無三年之蓄曰國非其國也故古昔君子率以積貯為大計蓋當豐亨豫大之時而為吾民深長之慮脫有凶荒官府得以濟之則於呻吟之民亦不無少助矣查嘉靖八年為嚴處預備倉糧以防歉歲事蒙

巡撫都御史王 行令各該州縣給領官銀糴穀備

賑以後或陸續給賑貧民或給賞打捕蝗蝻等項今查得本年五月終實在倉糧數目如恩縣米止一石五斗有零在平縣米一十五石有零博平縣米二十

二石有零其餘各該州縣恐亦無數年之積爲照令
歲二麥告成秋禾蔽野有年之慶亦可預占比及
成之後其價必賤合無通行所屬將預備倉作急
行修理除舊有空閑倉廩量加補葺外如有不足
行申請動支在庫銀兩廣治廩座臨時聽候明文
準收糴專備凶荒不許別項動支升合如有那移
貸及虛出通關等項情弊各照律例從重問擬及
各處富家大族田連阡陌今歲秋成數倍往昔則
粟拜官良亦有之合無行令各該州縣富民有能
粟一百石或一百五十石授以義官以榮終身
雜泛差徭或納粟至五百石或七八百石至千石亦
各量授散官有差通行奏請

旌表如此則儲蓄既廣倉庾就實有備可無患矣
一均田土以惠貧民

竊聞仁政必自經界始經界正而後井地均穀祿平
此聖王公天下之大法也近據聊城縣揭帖開稱稅
糧出於地畝地有定制故賦有常征山東之地如聊
城縣者有王糧有民糧又有軍糧交錯混雜先年巨
室富家用計置買地上其後大造黃冊公行囑託私
通里書或飛灑於見在人戶或暗藏於逃絕戶丁或

不落日眼而花分子戶或留在賣地戶內而不行過
割甚又暗襲仕宦名目假作寄庄人戶至今富者地
多而糧少貧者地少而糧多辦納不及人戶逃而十
排陪十排逃而里長陪故均地之說在大家多所不
便在小民深為有益如蒙伏乞通行均一以從民便
等因到府據此為照有田則有租此古今之通義而
欺隱田糧則法之所不赦者也訪得本府所屬濮州
聊城等處地方中間軍民相雜又兼

王掃子粒在內及貴家大族田連阡陌交相影射間有
地去糧存徵之富家則冊籍原未過割徵之本主則
尸丁俱已逃亡乃將前項錢糧致令十排人等望空
陪補終歲告哀先該本府已將在平高唐等處田土
丈量民頗稱便其他各處地方苦樂不同每思均一
繫于民隱合行查處如蒙合無於秋成之後行各該
守巡道親臨其地督同府州縣掌印正官從公踏勘
務要沿址履畝逐一丈量實在地若干應該納糧若
干拋荒地若干的係何人承種應該辦納糧差中間
果係田頃有餘各從寬分派止足原額稅糧不許分
外加添如有豪橫之徒肆為沮撓及里書人等飛詭
那移等項情弊就行拏問從重議擬申呈干礙勢豪

一併參奏庶事體均一而貧民末賴矣

禁科派以裕民生

竊聞民者邦之本財者民之心其心傷則其本傷其本傷則其枝葉凋瘁當其事者固不可不加之意矣近據朝城等縣民周哲等告稱里長段祿并支應牌子鍾雨等每月科錢二十四千八百文有零通計一歲共科錢二十九萬七千文有零及吊查支銷文簿除一應公務例應支給外其餘銀兩則或盛張公菴而下著侈萬錢之資或置買家火而官衙極供帳之需指修理而費血塗膏藉迎送而指一科十及訪得

各該州縣凡遇更替里長一丞一簿各索見面等錢或往或來動有支應之物此皆分外科差朘民膏血里甲之害莫此為甚除將犯人段祿等各問擬雜犯等罪外切恐里甲科歛不獨朝城一處為然中間有賢能守令搏節愛養民必受福其他則歲以為常留心釐正者幾何人哉况山東地方連歲災傷重以兵燹民勞已極所幸今歲雨澤幸沾收成在望譬如病者尪羸而煦煦待哺之時也即今若不通行禁約少加撫恤切恐麥絲糶盡流亡復作有地方之責者將亦不得安枕而卧矣如蒙伏望通行各屬掌印正官

務要深恤民隱剷除宿弊將該年里甲除歲辯置買馬匹鋪陳及新官到任置買家火照依巡撫衙門見行事例動支外其餘一應公私宴會及各官索取年例見面等錢俱通行嚴加禁革中間如有侈僭貪污不復愛惜者事發各照不職事例議擬若係入已之贓仍查照見行條約從重問發庶幾法令嚴明事體有定上省其一民受一分之賜矣

一慎刑獄以重民命

竊聞主刑者民之司命也可不慎乎故孝婦含冤三年大旱天人相與之幾亦昭昭有不可誣者古昔循

吏視民如子近來刻薄成風鍛鍊是逞問之則曰茲乃尚嚴之時非可以尋常寬大治也夫蒞官刑法非禮威嚴之行則嚴亦不可少者要之施諸奸頑胥吏強梗土豪及積年書算主文應捕民快與門禁等項素為民害者繩之以法彼乃無敢縱恣庶幾保安民善若一切無知小民則固當煦煦然視之如子矣乃今為守若令者率皆猖狂自恣罔恤民命不問事之大小情之輕重少有相忤動用拶指夾棍董答終日近據民人王文登告稱伊父王漢先年失馬被民人連廣偷盜去任理刑推官却將伊父偏刑拷訊二日

致將脚蹠夾落無幾就死夫此一人耳其身體髮膚猶之父母也乃以無辜受禍其慘如此亦獨何心哉數十載之後爲之扼腕不平久矣除本官已行問革外訪得各該州縣等官徃徃任情用刑立威播虐小民敢怒而不敢言至於斷獄亦止信一時喜怒或據吏胥主文人等供狀其輕重出入尤多失當不知一字之間死生攸繫如蒙伏望通行所屬今後務各軫念黎元推誠撫字慎重用刑除強竊盜及前項在官積年人等有犯該當拷訊者照舊施行外其餘一應小案不得用嚴刑致殘肢體至於斷訟仍要虛心推鞫兩詞並聽務使罪人心服毋得故違出入及偏刑苦拷致傷民命如違許被害之家具告各照酷刑故勘等律議擬參究則刑罰清而民服矣

一察巡捕以防誣執

查得問刑條例一各處司府州縣衛所等衙門快手人等賣放強盜誣執平民爲從事發有顯跡情重者旗軍發邊衛民并軍丁發附近俱充軍情輕者問罪枷號一箇月縱容官員作罷軟黜退失覺察者照常發落等因爲照寇賊奸宄王法必誅然必須真得其情雖死不怨但各該軍衛有司巡捕官員率多不諳

事體往往輕聽快手軍牢或番子手等項告報輒便
細拏或逼令盜賊指攀而得財即放或謬用非法拷
打而含冤妄招或一事而牽連數十人或一人而掇
供三五處甚或未經失主對問而止吊別處賊案以
取供或本無贓仗可憑而搜索本家衣物以足數既
而轉報各該掌印等官亦各不行用心覆審間有問
者每拘成案雖心知其冤或避嫌而不敢爲之理者
亦多矣近該武城縣市民馬傑將平民孫汝立因借
債不與輒就非刑細拏逼令認盜及又唆扶崔氏告
稱被伊殺死官從昇等情該縣知縣史筆不行詳審

乃止據陰陽官周師孔原招問擬死罪夫其往來械
繫已及二年斬罪重刑濱於一決至於官從昇殺死
之日孫汝立方在在平相隔一二百里豈能飛度後
遇巡按按臨審錄稱冤已將孫汝立重復保勘明白
方行釋放訖况一強一竊之間一死一生攸判若不
曲加詳審深恐濫及無辜如蒙乞行各該軍衛有司
巡捕等官今後勘問強盜竊盜必須臨時捕獲或訪
拏有真正贓仗審係無冤方許成案不許聽信讐賊
信口指攀一緊拘繫如有輕刑無辜妄行問斷及快
手市民等項誣執平民爲盜及指巡捕爲由搶奪財

物各照律例從重問擬發遣職官亦各參奏罷黜庶刑獄平而民不寃矣

一減夫價以寬民力

查得聊城縣夫廠原額設濮州朝城等縣共牌夫一千五百名往年全係正身應當近奉事例一半正身應役一半折銀雇夫更歲輪流事體亦便查得嘉靖七年每夫徵銀六兩已徵在官銀二千九百七十九兩有零除已支用外剩銀二千四百兩有零嘉靖八年奉例寬減每夫徵銀四兩已徵在官銀一千九百餘兩除已支過外見在銀一千五百餘兩為照各該

戶部係下則人戶僉派先於正 斗問河下往來

進貢進鮮及侯伯等項家人倚稱官府往往多勒夫役索要折乾動以百計一時應役不前動加凌虐今幸事體頗定凡遇一應牌筏及使客等項船隻經過職等備加節省減撥夫役通計每歲大約用銀不過六七百兩雖後來事體未可逆料要亦不至往年之甚而因仍舊額每歲派徵殊無休息所據各設夫役應合量行減派以寬民力合無今歲審編均徭除一半正身七百五十名照舊外其餘七百五十名應解折銀者止派四百名每名照舊徵銀四兩行令解官其

減下三百五十名實該減銀一千四百兩俱行裁省
通融灑派於極貧下戶少加寬恤不許各該州縣留
作聽差及補上戶均徭之數其解到折色銀兩扣至
年終如有支剩悉填入循環貯庫待候豐年糴穀備
賑庶幾民力稍輕而貧民亦得沾惠矣

芥山集卷之二十三

分巡事宜

一為疏通水利以拯民困事台州府太平縣民蔡元等
告稱宋朱文公深慮民患修濬過洋大河以防旱澇
以便糧運軍民世享其利誠為衆河之祖天順年間
重得修理經今年遠淤塞河與田平上不蓄水下不
禦潮天僭臨寧黃太六縣裝運松海等衛所軍餉因
是閘河不通經山渡海人船遭風沉溺賣妻鬻子罄
產陪糶早晚禾稻凡遇天旱之時絕水車灌及至驟
雨停集滄沒連天禾稻萎死人民飢餓流遺十常八

九先年監生吳應節經具

奏蒙行司府委官疏濬至今未見舉行如蒙伏望垂憐
又因貧民嚴委廉幹官員立限疏濬完報寔爲地方
小民至願等情到道據此爲照因以養民水以灌溉
故禹貢濬畎距川成周以防止水蓋惟欲旱澇有備
用以資五穀而考文公之治浙東善政
備載典籍而其大者其時閘座之
設有六而啓閉之方疏濬之跡至今父老尚能傳之
乃茲數百年餘閘遂湮廢太平一縣處於群山之麓
凡夏秋雨溢洪水橫流漫無歸宿遂至湮沒民田蕩
覆民居甚至人口亦或爲之漂溺此往年受害昭昭
可鑒者也近該本道親詣該縣據生員謝思等耆民
陳伸良等咸相率控告求爲修復隨即經由過洋等
諸閘觀其遺址尚存惜多荒廢竊惟文公爲萬世道
學之宗而經濟之學其見於河防經界足以爲永世
之利者若此失今弗加修葺將恐日就汨沒豈惟先
正之澤弗可久傳而我民魚鱉之患或亦猶有可憂
者矣及查得該縣每年額派修橋銀兩俱解台州府
收貯且節年陳積數多未經支用即此以爲修閘之
資事體亦宜如蒙合無

俯賜鈞裁行令該府掌印官勘估上下閘座共若干里應該動調人夫若干當於何項差撥如果人夫不足即動支在庫官銀顧覓并一應工食器具等項應該用銀若干逐一議處明白具由申呈

本院聽候明文至日作速舉行務期底績庶旱澇有備地方無虞而古人善政固將沾被於千萬世矣等因具呈

巡按監察御史張

批修舉廢墜具見該道留心民

隱百姓受福多矣親詣該縣相度估計呈奪繳

爲申明

勅諭以保安海洋事照得本道近奉

勅諭提督所在軍衛有司等項官員修築墩臺關係整理

船隻器械操習水戰武藝及嚴禁官豪勢要之家不

許撐駕雙桅大船下海引惹倭賊其所委官員若有

怠忽偷安廢弛兵備私役軍士剋減月糧科歛財物

害人等情及管糧官員縱容軍民坵攬錢糧通同官

攢人等虛出盜賣等弊應拏問者拏問應奏請者具

奏處治欽此欽遵已經通行申飭外竊照本職猥以

踈庸謬茲責任海邦之夷險尚未周知武事之韜略

原非素練矧恩信未孚於平時鼓舞敢期於一旦照

得各該把總官將領是司才猷亦著相應推委用臣
不逮為此合行案仰本官文書到日即便遵照

勅諭內事理親詣各該地方嚴督所屬指揮千百戶等官
修爾墩臺利爾弓矢備爾甲冑操爾戰艦仍及時督
率官軍如法操練如古名將身先士卒之爲務俾武
備修明可以寢外夷深入之謀海徼肅清可以紓

九重南顧之慮本道不日按臨考察閱視中間果有文武
全才堪以大受者定行具實推薦用備褒崇如有曠
職偷安廢弛邊備致悞軍機大事者各行叅奏罷黜
此固臣工所以圖報於

今日者其各體之慎之先具不違依准并離任日期及
某日至其處操練過官軍有無中式若干數目開具
文冊陸續差人呈報施行

右牌行把總指揮王祚顧邦重楊和崔鼎

一爲考選軍政官員事照得本道近蒙奉兵部題奉
欽依事理考選軍政蓋仰承

明詔簡拔人材將爲保障地方之深計也顧本道才識疎
庸蒞事日淺於各該官員賢否漫無知識深恐評品
失真賢愚倒置匪直廢予奪之公尤重貽地方之患
所賴各一賢豪相與同心訪覈用臣不逮爲此牌仰

本府着落當該官吏照依牌內事理即將本該衛所武

職大小官員逐一嚴加密訪某也公勤幹濟撫恤軍

士某也政務不廢弓馬熟閑某也武備不修剝削軍

士某老某弱某壯某關其有文武全才政行卓異

及奸盜酗酒侵欺錢糧等項俱要一一明白直書以

備采擇不許含糊泛濫苟且搪塞亦不許聽信夤緣

請托有妨至公是將藉以奏

聞用効以人事君之義匪徒取辦故事而已也其向體之

以副委任

右牌行

寧波

紹興

台州三府

臨觀 松海 昌九 衛

通判薛甲王時濟推官馬中驥陳叢
把總松司清輝王祚定海指風顧厚重
餘知縣顧存仁上虞知縣張光祖

議築堤以防民患事近據署新昌縣事通判江軾申

稱先該分守道并水利道會案議處修築東堤衝坍

處所計工料價銀七百二兩修補未完隨該分守道

行委山陰知縣劉昂議處將灣曲狹窄受水處所改

闊取直更移修築勘估用銀七千五百七十二兩呈

蒙本道并水利道會案案本院批行該道與縣中年

高有德耆老及鄉士夫從其議處如不可行止照舊

補築舊堤等因及稱劉知縣所議何家埠至止水廟

取直於淺濶中另築堤一百一十丈計銀一千七百九十兩費巨而力艱今只循舊還加以護礮可減銀二千三十餘兩則民患可禦公帑亦節等因本道隨即親詣各堤備加相度蓋新昌之水自南而北又轉而之西水勢縈迴山巒環合誠爲風氣攸萃之地故自宋元以迄于今四五百年人文相望蔚於浙東其來固有自矣但溪流發於天姥滙于東澤或遇秋雨浸淫洪水泛溢間亦有逼近民居而爲之患者故一見於成化十五年再見於嘉靖八年于時皆因舊堤重加修葺民習恃之以無恐惟是嘉靖十三年秋大

之且該縣故堤古光潭等處年久圯壞幾於平地重以洪水橫流尤爲百年未有之變故一時突入衝決我民居覆溺我民命此寔仁人之所隱焉而思患預防有不可緩焉者惟自地勢言之西北之勢高而東南之地形漸下飛沙亂石壅諸尾閘其自止水廟而南地形狹窄比諸上流僅得三分之一夫下流既壅而水道復無容受則滙而爲波濤激而爲澎湃懷山襄陵勢所必至其能保其不倒流而旁溢哉今不濬其流而徒欲於先古潭等處增築堤岸已涉第二義况古潭諸處因地之狹且欲拆民居以寬水道至於

止水廟至何家埠則欲侵水之故道相與爭衡竊恐有未然者且新昌同一民也古今同此天下也審據民人石蘊興等環聚而控告曰我爲先儒石子重之後蓋自宋元至今世世守此土亦無水患今欲遷徙我將疇依及至止水廟召諸耆老而與議曰夫殺水之勢在於容受之廣狹而不在堤形之曲直防民之患在於金湯之險固而不徒防潰之彌縫使水道既侵而績用弗成雖堤直如弦其能保其弗溢而爲患哉况水中興作地本卑濕工力難成縱使強勉成之反以激水性而成大患其他區區費財固猶有不足

論者也竊嘗聞之成大事者不計小費論爲政者在得人查得該縣自嘉靖十三年該知縣口章議議銀七百餘兩修築防患迄今已逾年矣遷延月日尚未成近該本道閱視已成者造作弗堪未成者毫無稽考蓋通判江軾才力綿薄性氣迂踈故視事三年而往來于府者僕僕終日其諸工作率委諸老人等後由是而加至七千餘兩恐非若輩之所能勝是以是而欲功之有成財之有節職未敢以爲然也近聞本院行委東陽知縣吳希孟勘處爲照本官才力精敏遇事有爲合無待勘估至日就令本官督理

擇該府賢能官員相與協力相度議處共濟時艱刻期興作則功易就緒可以防民之患而費出有經亦可以節民之財矣本職謏薄無知謹述所詢于鄉民者如此敢用上聞伏乞俯賜尊裁地方幸甚

一為嚴禁多收以勵官箴事案照先蒙

巡按浙江監察御史張 案驗款開各該地方軍民利病有可興革凡所以為民造福者俱要悉心體察斟酌停當申呈議處以安吾民等因遵依外近該本道巡歷紹興等處地方具竦縣民邢宗哲告稱該縣每年各官馬夫柴薪銀二兩多收至三三兩小民受累

見今審編之年乞行禁革等語至道據此為照

國家設官分職各有俸給以為養廉之資其在外臣工復有馬夫銀兩以備顧役之用多者計一百餘兩少亦不下五六十兩令其備辦薪米供給芻秣以便各官供職此其體悉群臣亦已至矣為臣子者仰承

欽命忝竊地方其於百姓漫無補益計食任事方當愧竦不暇而乃於正額之外復敢多收若此亦獨何心哉嘗觀古人克成格天事業曰一介不以取諸人其在大明律凡有司官吏人等非奉上司明文因公擅自科歛所屬財物入己者並計贓以枉法論夫吾儒誦法古

人祇奉

彙憲乃茲損下益上如此揆之於道於法皆為無據竊
惟高明之士諒不坐此其於僚屬則固以同官之故
或有坐視而不之禁者矣及訪得各縣有等豪富人
戶希圖交結官府出入衙門每每藉此為階因而囑
托公事減免差役各官貪餌受賄縱容恣肆莫敢誰
何其貧窮小民或又辦納不前輒復刁難筆楚為害
滋甚況今浙東地方連歲災傷民困已極凡大小臣
工正宜同加循省用副

朝廷子惠困窮之意乃今適當審編均徭之年通變宜

其茲惟其時所據前項多收情弊恐不獨紹興所屬
為然相應通行議革如蒙伏乞

俯賜鈞裁如果事體相應乞為通行各府自嘉靖十

五年正月審編均徭既定之後凡應得依給并馬夫

柴薪銀兩止照原額徵收仍出給大字告示省諭花

戶與同里老人等將坐派銀兩各照正數傾瀉成錠

解送掌印官當堂收貯聽候按季支給不許分外加

添分毫秤頭耗銀亦不許豪富人等夤緣出入如有

佐貳等官不畏名義不守官箴仍前勒索者掌印官

即行糾舉用示靖共仍許被害之人赴道陳告照例

坐贓問罪罷黜如此度節以制度用肅官常寬一分
民受一分之賜矣等因具呈巡按浙江監察御史張
批柴薪馬夫銀兩本院已行禁約各縣緣何故違
該道除將新昌嵎縣掌印免提候查出另行外其縣
丞主簿典史提問計贓詳奪解繳

一為清審獄囚事照得刑獄之設所以懲奸頑而嚴法
守者也但所犯情罪各有輕重囹圄之苦度日如年
是惡可不加之意哉近該本道按臨紹興等處審得
該府見監囚犯孫洪等一百二十餘名其間或多係
誑誣曾未對理或已奉明文猶未發落若此之類恐

不獨紹興為然況今天氣炎熱若不備加清審深恐
累及無辜擬令通行為此合行牌仰該府即行掌印
官將見監罪囚逐一清審除強盜人命重刑照舊監
禁外其餘一應囚犯自文書到日務要作速清審明
白應釋放者即與釋放應召保者即行召保應問解
報審者查照原行問解中呈發落各將審理釋放過
囚犯姓名數目造冊具由繳報查究毋得仍前淹禁
訪出或被人控告自取罪咎不便抄牌依准申來
一為出巡事近該本道按臨諸暨地方清審獄囚審得
見監犯人石公旻等俱係糧長侵欺錢糧有正德十

五六十年者有嘉靖二三年或十一二年者俱例應定
發邊衛禾遠充軍等項罪名中間亦有曾經遇

赦免其罪名仍該追贓者審據各犯監禁年久身無完膚
爲照奸頑之徒侵漁

國賦朘削民膏誠爲可惡但亦有年遠人亡而無辜子
孫被其貽累者或又有正犯身死而顧工人役代其
械繫者年復一年曾無完納夫今不處恐垂死獄中
終不得脫深爲未便爲此合行示仰各該里老人等
將各正犯原有家產從公查審盡數報官乘此豐年
變賣完納或有同舉家屬得過之家量爲幫助中間

亦或有先被官司催逼追徵未完虛文起解尚在花
戶名下拖欠者許從實赴縣陳告行拘花戶與之對
理明白責令完納若係涉虛不許妄行攀害一槩拘
擾仍將本犯治罪其果完過若干家產盡絕從實開
呈本道以憑議處分豁至於近年領出官銀未經起
解者據法即當重治但念小民無知因循已久一旦
盡絕以法民寔不堪示出之後限五日內果將原銀
赴官秤完足封貯在庫另行給批起解本道亦姑
免其重罪從輕發落若恃頑不納定行拏問照例發
遣施行爾等亦自無辭矣故示

一為節財用以蘇民困事近該本道按臨諸暨查得該縣嘉靖十三年用過銀五百二十餘兩十四年用過銀三百八十餘兩及查老人王世章等買辦私簿俱各開稱每日饋送下程置辦酒席各官私衙油燭并公堂心紅筆墨各房該吏紙劄等項之用為照該縣每年額派支應銀一百兩正以備應付柴燭之資其合用紙劄例於該縣二分紙內支用其他各官私衙日用油燭則自有本等俸給支用亦安得取諸民手及照該縣每月各吏取紙獨多通計一年用過一二百兩俱是巧立名色陰行騙取官司受其蒙蔽小民被其誅求日朘月削曾無忌憚况該縣連歲災傷民困未蘇凡此銖銖兩兩是皆取諸小民之脂膏者也而有司官乃漫不之恤不知為民父母之責安在除將該吏薛忠老人王世章等拏問外合行禁約為此示仰該縣官吏人等示出之後各宜奉公守法每年一應支費止於改議文冊原額坐派銀兩內動支其紙劄心紅遵照原行於紙價內支給買辦其一應燕會酒席并各官私衙油燭通行禁革敢有仍前不畏名節不守法度恣行求索者除另行體訪外許被害之人具實赴道陳告以憑拏問定行坐贓治罪不恕

此係恤民守官事理其各慎之毋貽罪悔

一爲出巡事示仰諸暨縣百姓知悉照得本縣地方連年災傷兼之久缺正官無人經理撫恤以致百姓無依事體廢墜如錢糧或已徵在官而奸頑侵欺或徵收未完而小民拖欠如刑名或勘官枉問而含冤無訴或刁詐扛幫而捏詞告擾其官司追問差人下鄉輒就假借聲勢索費銀物需求酒食少有不從就以拒捕爲詞激怒官府治以重罪及訪得本縣因係僻處山谿道路險阻其豪猾之徒凡遇官司差人追徵錢糧勾攝公官亦復攬險逃匿不行出官或又因而

拒毆差人者亦多有之除已往不究外本道見公歷地方正爲究察奸弊伸理冤枉及勘處強盜人命等項重情凡有虧枉許從實赴道陳告以憑究問不許將遠年不干已者一舉牽告及有積年光棍頂名代告審出定行追究教唆并寫狀扛幫人等枷號重治其見奉行提者仰各遵約束即日赴官本道從公分理務愜民情决不深求舊惡敢有恃頑不服者就以上豪孽問枷號從重究問其積年光棍管充差遣生事害人者亦各照例拏問發遣施行的不虛示

分移 通行

成酷吏

一為正貪酷以勵庶官事據紹興府解到犯人監佐到道招稱由監生任嶷縣丞狀招自到任以來不合容留積年門子書手在衙說事過錢嘉靖十三年二月內佐受要新倉庫子史廷祥銀十兩因而親信比有監故張六與伊親家茹富因爭奪財禮牛隻茹富誣告張六強盜等情史廷祥為茹富證稟佐不合聽信輒用嚴刑夾打誣執強盜張六等不肯承認佐發怒亦又不合喝令皂隸將張六捆綁板壁上仰面向天將燒酒一壺灌入鼻內血出滑地張六受刑不過

只得虛招與謝廿六等強盜情由致蒙將張六等七人俱問斬罪當即打死三人其餘監候處決隨該本道審錄覆審得張六男張谷年一十四歲時方垂髻極口稱冤心為惻然隨行該縣拘提里隣史尚敬等到道再三研審前情委係虧枉當即辯問改擬徒杖罪名招呈巡按衙門詳允照例發落外參照縣丞藍佐濫叨民牧罔慎官箴賦性兇殘以草菅而視民命存心貪婪較錐刀以索民財視篆半年規計百出贓罰紙價通門庫而盡入私囊燒酒淫刑致平民而率就死地况以垂髻之童稚亦坐無辜之極刑萋菲成

於一言羅織致死三命言之痛心忍哉酷吏除將本
犯從重問擬外竊恐所屬地方官吏不獨藍佐一人
爲然若不通行戒諭誠恐濫及無辜爲此仰抄案回
府縣着落當該官吏照依案驗內事理各宜奉公守
法節用愛民以古之循良自期以今之藍佐爲戒毋
聽讒言毋通賄賂毋逞淫刑毋干

國法使部屬小民咸有父母之望庶無負

國家設官分職愛養黎元之意而本道濫竽地方亦庶
免於罪愆矣其或故犯明禁稔惡不悛體訪得出或
被人告發

國有常刑我不敢貸其各體之慎之毋貽後悔

右通行寧紹台三府